

四庫全書

子部

欽定四庫全書

子部

石林燕語卷二

詳校官中書臣葉元符

員外郎臣牛檢文覆勘

郎中臣丁雲錦覆勘

滕錄監生臣單可姪

欽定四庫全書

子部十

提要

石林燕語十卷

雜家類三 雜說之屬

臣等謹案石林燕語十卷宋葉夢得撰夢得有春秋傳已著錄夢得為紹聖舊人徽宗時嘗司綸誥於朝章國典夙所究心故是書纂述舊聞皆有闕當時掌故於官制科目言之尤詳頗足以補史傳之闕與宋敏求春明退

朝錄徐度却掃編可相表裏陳振孫書錄解題謂其書成于宣和五年然其中論館伴遼使一條建炎三年又論宰相一條謂自元祐五年至今紹興六年則書成於南渡之後振孫之說未核矣惟夢得當南北宋間戈甲倥偬圖籍散佚或有記憶失真考據未詳之處故汪應辰嘗作石林燕語辨而成都宇文紹奕

宋紹奕始末無考嘉定中有樞密使宇文紹節疑其昆弟亦作考異以

糾之應辰之書陳振孫已稱未見蓋宋未傳

本即稀儒學警悟

素儒學警悟亦南宋之書不著撰人名氏

開引

數條與紹奕考異同散見永樂大典中然寥

寥無幾難以成編惟紹奕之書尚可裒集謹

蒐采考校各附夢得書本條之下雖其間傳

聞年月之訛繕寫字畫之誤一一毛舉或不

免有意吹求頗類劉炫之規杜預吳縝之糾

歐陽修而援引舊文辨駁詳確者十之八九

是一朝故事得夢得之書而梗槩具存得紹奕之書而考證益密二書相輔而行於史學彌為有裨矣又夢得之書宋槧罕覩前明有大字刊本摹印亦稀世行毛晉津逮秘書所載脫悞頗多而商濬稗海所載踳駁尤甚今併參驗諸本以永樂大典所載詳為勘校訂訛補闕以歸完善凡所釐正各附案語于下方用正俗刻之訛庶幾稍還舊觀不失其真焉

乾隆四十六年三月恭校上

總纂官臣紀昀臣陸錫熊臣孫士毅

總校官臣陸費墀

葉夢得石林燕語原序

宣和五年余既卜別館於卞山之石林谷稍遠城市不復更交世事故人親戚時時相過周旋嶼巖之下無與為娛縱談所及多故實舊聞或古今嘉言善行皆少日所傳於長老名流及出入中朝身所踐更者下至田夫野老之言與夫滑稽諧謔之辭時以抵掌一笑窮谷無事偶遇筆札隨輒書之建炎二年避亂縉雲歸兵火蕩析之餘井閭湮廢前日之客死亡轉徙略相半而余亦

老矣游罹變故志意銷隨平日所見聞日以廢忘因令棟更哀集為十卷以石林燕語名之其言先後本無倫次不復更整齊孔子語虞仲夷逸曰隱居放言而公明賈論公叔文子曰夫子時然後言人不厭其言子曰然夫言不言吾何敢議抑謂初無意於言而言則雖未免有言以余為未嘗言可也八月望日石林山人序

欽定四庫全書

石林燕語卷一



宋

葉夢得

撰

宇文紹奕 考異

太祖皇帝徵時嘗被酒入南京高辛廟香案有竹柝筮
因取以占己之名位以一俯一仰為聖筮自小校而上
至卽度使一一擲之皆不應忽曰過是則為天子乎一
擲而得聖筮天命豈不素定矣哉晏元獻為留守題廟

中詩所謂庚庚大橫兆聲欬如有聞蓋記是也

太祖英武大度初取僭偽諸國皆無甚難之意將伐蜀
命建第五百間於右掖門之前下臨汴水曰吾間孟昶
族屬多無使有不足昶既俘即以賜之召李煜入朝復
命作禮賢宅於州南畧與昶等嘗親幸視役以煜江南
嘉山水令大作園池導惠民河水注之會煜稱疾錢俶
先請覲即以賜俶二居壯麗制度略侔宮室是時諸國
皆如在掌握間矣昶居後為尚書都省俶居至錢思公

惟演亦歸有司以為冀公宮錫慶院今太學其故地也
考異禮賢宅在京城南錢俶入覲太祖以此館之至
太宗初俶納土始賜馬非俶先請覲即賜也錢思公
與諸弟乞歸之有司非思公獨請也

漢凡王宮皆曰禁中後以元后父名禁遂改禁為省唐
以前天子之命通稱詔武后名照遂改詔為制肅代後
集賢院有待制之名即漢東方朔之徒所謂待詔金馬
門者也京師大內梁氏建國止以為建昌宮本唐宣武

節度治所未暇增大也後唐莊宗遷洛復廢以為宣武

軍

按此句舊本脫武字
今據五代會要增正

晉天福中因高祖臨幸更號大

寧宮今新城是也其增長外羅城蓋周世宗始為之

考異漢制度云帝之下書有四一曰策書二曰制書

三曰詔四曰戒勅此云天子之命通稱詔書非也唐

永徽中命弘文館學士一人日待制於武德殿西門

則待制名非始於肅代以後也明皇置翰林院延文

章之士至術數之士皆處之謂之待詔即待詔之名

初不改也

太祖建隆初以大內制度草創乃詔圖洛陽宮殿展皇城東北隅以鐵騎都尉李懷義與中貴人董役按圖營建初命懷義等凡諸門與殿須相望無得輒差故垂拱福寧柔儀清居四殿正重而左右掖與昇龍銀臺等諸門皆然惟大慶殿與端門少差爾宮成太祖坐福寧寢殿令闢門前後召近臣入觀諭曰我心端正如此有少偏曲處汝曹必見之矣羣臣皆再拜後雖嘗經火屢

修率不敢易其故處矣

太宗即位尊孝章皇后為開寶皇后移居東宮而不建
名真宗尊明德太后始名所居殿曰嘉慶後中書門下
請為皇太后建宮立名於是詔築宮曰萬安明肅太后
既臨朝不築宮止名所居殿曰會慶明肅上仙遺詔進
太妃楊氏為皇太后乃名所居為保慶號保慶太后訖
治平慈聖宮曰慈壽元祐宣仁宮曰崇慶建中欽聖宮
曰慈德皆遵用萬安故事也崇寧初元符太后宮稱崇

恩蓋進太后故禮加於開寶云

案崇寧初以下原本誤
另作一條據文義當合

為一今
改正

崇政殿即舊講武殿惟國忌前一日及軍頭司引見呈
試武藝人吏部引改官人即常朝退少頃以衫帽再坐
忌前則服澹黃衫皂帶自延和殿出降階由庭中步至
不乘輦遇雨然後行西廊皆祖宗之舊也從官獨二史
得入侍舊制不甚大崇寧初始徙向後數十步因增舊
制發舊基正中得玉斧大七八寸玉色如截肪兩旁碾

波濤戲龍文如屈髮制作極工妙余為左史時每見之
蓋古殿其下必有寶器為之鎮今乘輿行幸最近駕前
所持玉斧是也

東華門直北有東向門西與內東門相直俗謂之謬門
而無榜張平子東京賦所謂謬門曲榭者也薛綜注謬
曲屈斜行依城池為道集韻謬字或作移以為宮室相
連之稱今循東華門牆而北轉東面為北門亦可謂斜
行依牆矣凡宮禁之言相承必皆有自也

啓聖禪院太宗降誕之地太平興國中既建為寺以奉
太宗神御太祖降誕於西京山子營久失其處真宗朝
嘗遣人訪之或以驍勝營旁馬廐隙地有二岡隱起為
是復即其地建應天禪院以奉太祖天聖中明肅欲置
真宗神御其間而難於遺太宗因以殿後齋宮並置二
殿曰三聖殿慶歷中始名太祖殿曰興先太宗曰帝華
真宗曰昭考

考異昭考當作昭孝

瓊林苑金明池宜春苑玉津園謂之四園瓊林苑乾德
中置太平興國中復鑿金明池於苑北導金水河水注
之以教神衛虎翼水軍習舟楫因為水嬉宜春苑本秦
悼王園因以皇城宜春舊苑為富國倉遂遷於此玉津
園則五代之舊也今惟瓊林金明最盛歲以二月開命
士庶縱觀謂之開池至上巳車駕臨幸畢即閉歲賜二
府從官燕及進士聞喜燕皆在其間金明水戰不復習
而諸軍猶為鬼神戲謂之早教玉津半以種麥每仲夏

駕幸觀刈麥自仁宗後亦不復講矣惟契丹賜射為故
事宜春俗但稱庶人園以秦王故也荒廢殆不復治祖
宗不崇園池之觀前代未有也

太祖嘗問趙中令禮何以男子跪拜而婦人不跪趙不
能對詢徧禮官皆無知者王貽孫祁公溥之子也為言
古詩長跪問故夫即婦人亦跪也則天時婦人始拜而
不跪因以太和中張建章渤海國記所載為證趙大賞
天聖初明肅太后垂簾欲被袞冕親祠南郊大臣爭莫

能得薛簡肅公問即服衮冕陛下當為男子拜乎婦人拜乎議遂格禮九拜雖男子亦不跪貽孫之言蓋陋矣簡肅亦適幸其言偶中使當時有以貽孫所陳密啓者則亦無及矣然天下至今服簡肅之抗論也

母后加謚自東漢始本朝后謚初止二字明道中以章獻明肅嘗臨朝特加四字至元豐中慶壽太皇太后上仙章子厚為謚議請於朝詔以太后功德盛大四字猶懼未盡始仍故事遂謚慈聖光獻自是宣仁聖烈與欽

聖憲肅皆四字云

考異始仍故事當作姑仍故事詔云今以四字為謚
大懼未足形容萬一姑循故事而已宜以四字定謚
熙寧末年旱詔議改元執政初擬大成神宗曰不可成
字於文一人負戈繼又擬豐亨復曰不可亨字為子不
成惟豐字可用改元豐

范魯公質王祁公溥皆周朝舊相太祖受禪時質年四
十四溥四十二在位俱二年質罷八年薨溥二十年薨

雍容禪代之際疑問不生雖二人各有賢德然太祖保全大臣亦前代所未有也質性本卞急好面折人過然以廉介自居未嘗營生事四方饋獻皆不納太宗嘗論前宰相以質循規矩慎名器持廉節為稱溥寬厚喜薦導後進罷相時其父尚無恙猶常執子弟之禮不廢貽永尚太宗女乃其子也

張伯玉皇祐間為侍御史時陳恭公當國伯玉首言天下未治未得真相故也由是忤恭公仁宗時眷恭公厚

不得已出伯玉知太平州然亦惜其去密使小黃門諭
旨勞之曰閭鄉貧無慮朕當為卿治裝翌日中旨三司
賜錢五萬恭公猶執以為無例上曰吾業已許之矣卒
賜之祖宗愛惜財用如此又見所以獎勵言官之意也
明肅太后上徽號初欲御天安殿即今大慶殿也王沂
公爭之乃改御文德殿元祐初宣仁太后受冊有司援
文德故事為請宣仁不許令學士院降詔蘇子瞻當制
頗斥天聖之制猶以御文德為非是既進本宣仁批出

曰如此是彰先姑之失可別作一意但言吾德薄不敢比方前人聞者無不畏服是歲冊禮止御崇政殿

考異按子瞻草詔云矧予涼薄常慕謙虛豈敢躬御治朝自同先后處之無過之地乃是愛君之深內批常慕字以下二十六字旨意稍涉今是不免有昔非之議可叙述太皇太后碩德實不及章獻不敢必依章獻御文德殿故事宜三省改此意進入

韓魏公為英宗山陵使是時兩宮嘗為近侍姦人所間

一日侵夜忽有中使持簾帷御封至魏公持之久不發
忽自起赴燭焚之使者驚懇曰有事當別論奏安可輒
焚御筆公曰此某事非使人之罪也歸但以此奏知卒
焚之有頃外傳有中使再至公亟出迎問故曰得旨追
前使人取御封公曰不發焚之矣二使歸報慈聖太后
歎息曰韓琦終見事遠有斷

考異英宗當作仁宗

大遼國信書式前稱月日大宋皇帝謹致書於大遼國

徽號皇帝闕下入辭次具使副全銜稱今差某官充某事國信使副有少禮物具諸別幅奉書陳賀不宣謹白其辭率不過八句回書其前式同後具所來使銜稱今某官等回專奉書陳謝不宣謹白不具副使銜辭亦不過八句元祐間宣仁太后臨朝別遣太后使副以皇帝書達意式皆如前但云今差某官充太皇太后某使爾賀書亦如之

元祐垂簾呂司空晦叔當國元日欲率羣臣以天聖故

事請太后同御殿行慶會稱賀之禮宣仁謙避不從止
令候皇帝御殿禮畢百官內東門拜表而已蘇子容當
制作手詔云顧惟菲涼豈敢比隆於先后其在典法亦
當幾合於前規是歲進春帖子其一篇云上壽春朝近
外廷詔恩不許會公卿即時二史書謙德只使羣官進
姓名

國朝典禮初循用唐開元禮舊書一百五十卷太祖開
寶中始命劉溫叟盧多遜扈蒙三人補緝遺逸通以今

事為開寶通禮二百卷又義纂一百卷以發明其旨且
依開元禮設科取士嘉祐初歐陽文忠公知太常禮院
復請續編以姚闢蘇洵掌其事為太常因草禮一百卷
議者病其太簡元豐中蘇子容復議以開寶通禮及近
歲詳定禮文分有司儀注沿革為三門為元豐新禮不
及行至大觀中始修之鄭達夫主其事然時無知禮舊
人書成頗多牴牾後亦廢

士大夫家廟自唐以後不復講慶歷元年郊祀赦聽文

武官皆立廟然朝廷未嘗討論立為制度無所遵守故久之不克行皇祐二年初祀明堂宋莒公為相乃始請下禮官定議於是請平章事以上立四廟東宮少保以上立三廟而其詳皆不盡見文潞公為平章事首請立廟於洛終無所考據不敢輕作至和初知長安因得唐杜佑舊廟於曲江猶是當時舊制一堂四室旁為兩翼嘉祐初遂做為之兩廡之前又加以門以其東廡藏祭器西廡藏家牒枋在中門之右省牲展饌滌濯等在中

門之左別為外門置庖廚於中門外之東南堂中分四
室用晉荀安昌公故事作神板而不為主唐周元陽祀
錄以元日寒食秋分冬至為四時祭之節前祭皆一
日致齋在洛則以是祭或在他處則奉神板自隨倣古
諸侯載遷主之義公元豐間始致仕歸洛前此在洛無
幾則廟不免猶虛設乃知古今異制終不可盡行也
父沒稱皇考於禮本無見王制言天子五廟曰考廟王
考廟皇考廟顯考廟祖考廟則皇考者曾祖之稱也自

屈原離騷稱朕皇考曰伯庸則以皇考為父故晉司馬
機為燕王告祔廟文稱敢昭告于皇考清惠亭侯後世
遂因不改漢議宣帝父稱祭義初請謚為悼曰悼太子
魏相以為宜稱尊號曰皇考則皇考乃尊號之稱非後
世所得通用然沿習已久雖儒者亦不能自異也

考異曲禮祭父曰皇考此云父沒稱皇考於禮本無
見非也

治平中議濮安懿王稱號學士王禹玉中丞呂獻可諫

官范景仁司馬君實等皆謂宜稱皇伯此固顯然不可
歐陽永叔為叅政尤詆之五代史書追尊皇伯宗儒為
宋州刺史所以深著其說然遂欲稱考則不免有兩統
貳父之嫌故議者紛然久不決慈聖光獻太后內出手
詔令稱親當時言官亦力爭而止以諸侯入繼古未有
也自漢宣帝以來始見之魏相以為宜稱皇考此固亡
乎禮之禮而哀帝稱定陶王為恭皇安帝稱清河王為
孝德皇則甚矣禮以王以皇以顯冠考猶是尊稱若舉

謚而加皇乃帝號既不足辨父子子而爵父此正禮之所禁也曾子固嘗著議以為父沒之通稱施於為人後之義為無嫌此蓋附永叔之意當時羣議既不決故仍舊但稱濮安懿王蓋難之也

考異時呂獻可為御史知雜范景仁為翰林學士此云呂中丞范諫官非也曾子固謂皇考一名而為說有三如禮之皇考則曾祖也漢宣帝父稱尊號曰皇考則加考以皇號也屈原稱皇考曰伯庸之類則父

沒之通稱也且言有可有不可者其剖析甚詳而以
悼園稱皇立廟為非今二說中專舉其父沒之通稱
之一句以為附永叔之意亦未盡也若謂皇乃帝號
則或曰皇考或舉謚而加皇苟以為不可則一也豈
得執一以為亡禮乎既以濮議稱皇伯為顯然不可
又以稱考為有兩統貳父之嫌然則當何稱乎歐陽
公嘗辨貳父則有之而非兩統也然則兩統或可以
言嫌而貳父亦謂之嫌非也

皇祐治平天下財賦歲入皆一億萬以上歲費亦一億萬以上出入畧相當景德官一萬餘員皇祐治平加二萬餘員景德郊費六百萬皇祐治平加一千萬以上二者皆倍於景德元豐中曾子固嘗請欲推考所從來悉為裁損使歲入如皇祐治平而祿吏奉郊之費同景德止二者所省已半以類推之歲入以億萬為率歲但省三之一則三十年當有九億萬遂可以為十五年之蓄議格不行此雖論其大約未必盡然要之言節用似當

畧倣此可以得實效愈於毛舉目前瑣碎徒為裁減之名而訖不能行也

仁宗慶歷初嘗詔儒臣檢討唐故事日進五條數諭近臣以為有補其後久廢元祐間蘇子容為承旨任經筵復請如故事史官學士採新舊唐書諸帝所行及羣臣獻納日進數事因詔講讀官遇不講日各進漢唐故事二事子容仍於逐事後畧論得失大旨當時遂以為例濮議廷臣既皆欲止稱皇伯歐陽文忠力詆以為不然

因引儀禮及五服勅云為人後者為其父母服則是雖
出繼而其本生猶稱父母也是以漢宣帝光武皆尊其
父稱皇考時未有難之者惟司馬君實任諫院獨疏之
云為人後而言父母此因服立文捨父母則無以為稱
非謂其得稱父母也此殆政府欲欺罔天下之人以為
皆不識文理若宣帝承昭帝之後以孫繼祖則無嫌故
可尊其父為皇考而不敢尊其祖為皇祖光武起布衣
雖名中興與創業同使自立七廟猶不為過况但止稱

皇考今上為仁宗子而稱濮王為皇考則置仁宗何地乎文忠得此亦無以奪之謂稱皇伯不然君實雖辯之力然無據依亦終不能奪文忠也

考異按兩制等議謂禮律為父母報云者勢當然不可云為叔伯報也趙大觀又引去婦出母為證則當時論難非獨溫公而此云未有能難之者惟司馬君實云云非也既云文忠得此亦無以奪之又云君實終不能奪文忠也則二者孰是况二公各持其論終未

嘗少屈乎

故事宰相食邑滿萬戶始開國賈文元罷相知北京未滿萬戶以出師佐平貝州功特封安國公其後以武勝軍節度使入為祥源觀使留京師請還節仁宗特置觀文殿大學士寵之觀文有大學士自文元始蘇子容挽辭所謂大邦開國賞元勳秘殿升班寵舊臣是也

故事臺官皆御史中丞知雜與翰林學士互舉其資任須中行員外郎以下太常博士以上曾任通判人未歷

通判非特旨不薦仍為裏行此唐馬周故事也議者頗病太拘難於應格熙寧初司馬君實為中司已請稍變舊制及呂晦叔繼為中司遂薦張戩王子韶二人皆京官也既而王荊公驟用李資深以秀州軍事判官特除太子中允權監察御史裏行命下宋次道當制封還詞頭已而次命李才元蘇子容皆不奉詔蓋謂旋除中允而命猶自選人而除也三人皆謫卒用資深近歲有差遣合用京官特改官而除者自資深始也

國朝經筵講讀官舊皆坐乾興後始立蓋仁宗時年尚
幼坐讀不相聞故起立欲其近爾後遂為故事熙寧初
呂申公王荊公為翰林學士吳冲卿知諫院皆兼侍講
始建議以為六經言先王之道講者當賜坐因請復行
故事下太常禮院詳定當時韓持國刁景純胡宇夫為
判院是申公等言蘇子容龔鼎臣周孟陽及禮官王汾
劉攽韓忠彥以為講讀官曰侍蓋侍天子非師道也且
講讀官一等待讀仍班侍講上今侍講坐而侍讀立不

應為二申公等議遂格令講讀官初入皆坐賜茶唯當講官起就案立講畢復就坐賜湯而退侍讀亦如之蓋乾興之制也

邢昺自翰林侍講學士以工部尚書知曹州仍舊職翰林侍講學士外除自昺始張文節公知白求罷叅知政事以刑部侍郎充翰林侍讀學士知天雄軍翰林侍讀學士外除自知白始昺班翰林學士上從其官也

欽定四庫全書

石林燕語卷二

宋 葉夢得 撰

宇文紹奕 考異

周官坐而論道謂之三公者非人臣也王乃天子公五等諸侯自三公而下皆卿大夫爾古者以六卿兼三公通謂之卿唐制宰相對正衙皆立而不奏事開延英奏事始得坐非尊之也蓋以其論事難於久立本朝范魯

公為相當禪代之際務從謙畏始請皆立則今經筵官
初皆得坐者非以其師尊之亦以講讀難久立故也太
祖開寶中召王昭素講便殿太宗端拱中幸國子監召
學官李覺講皆賜坐此出一時特恩非講官例也

考異周官以太師太傅太保為三公論道經邦則坐
而論道非謂五等諸侯也五等諸侯豈得云非人臣
乎周官孤卿大夫與三公皆不同豈得云三公而下
皆卿大夫乎三公不必備何必以卿兼公而通謂之

卿乎周公位冢宰乃公兼卿也開寶中乃開寶元年
端拱中亦端拱元年

應天府藝祖肇基之地祥符七年始建為南京詔即衙
城為大內正殿以歸德為名當時雖降圖營建而實未
嘗行天禧中王沂公為守始請減省舊制別為圖以進
亦但報聞其後夏文莊韓忠獻張文定相繼為守有請
僅能修祥輝崇禮二門而已元豐間蘓子容自南京被
召還朝復以為言但請以沂公奏先修歸德一殿約為

屋百間神宗亦未暇也至今惟正門以真宗東封回嘗
駐蹕賜赦觀酺賜名重熙頒慶樓猶是雙門未嘗改作
內中唯有御製詩碑亭二余為守時已將傾頽其中榛
莽殆不可入也

元豐官制行王禹玉為左僕射蔡持正為右僕射新省
成即都堂禮上郎中員外郎迎於門外僕射拜廳訖升
廳各判祥瑞案三道學士兩省官賀於廳上中丞尚書
以下百官班於庭下東西向僕射降階就褥位直省官

贊揖臺吏引中丞出班北向致辭賀復位直省吏贊拜
僕射答拜退即尚書省燕侍郎給舍以上及中丞學士
皆與時有司定儀制以間禹玉等拜辭神宗以官名始
正特行之自後為相者初正謝即辭例從之故惟此一
舉而已

元豐官制行吳雍以左司郎中出為河北都轉運使是
時神宗方經營朔方有巡幸之意密以委雍乃除直龍
圖閣都司除職自此始其後文及甫自吏部員外郎出

知陝府潞公在洛便養為請欲以示優禮亦除直龍圖閣郎官除職自此始皆非常例也故自是郎官出入皆未有得職者至元祐間范子奇自左司郎中除河北轉運使范純粹自右司郎中除京東轉運皆除直龍圖閣用吳雍例也

元豐五年官制初行新省猶未就僕丞并六曹寓治於舊三司司農寺尚書省及三司使廨舍七月成始遷入新省揭榜曰文昌府前為都省令廳在中僕射廳分左

右凡為屋一千五百八十間有奇六曹列於後東西向
為屋四百二十間有奇凡二千五百二十間有奇合四
千一百間有奇時首拜王禹玉蔡持正為相至元祐紹
聖間二人皆貶其後追治元祐黨人呂申公司馬溫公
呂汲公范忠宣劉莘老皆貶免者惟蘓公一人而已故
言陰陽者皆謂凡居室以後為重今僕射廳不當在六
曹前持正請遷遂遷舊七寺監移建如唐制既那其地
步欲速成將作少監李誠總其事殺其間數工亦滅裂

余為祠曹郎尚及居之議者惜其壯麗不逮前也

契丹既修兄弟之好仁宗初隆緒在位於仁宗為伯故
明肅太后臨朝生辰正旦契丹皆遣使致書太后本朝
亦遣使報之猶娣婦通書於伯母無嫌也至和二年宗
真卒洪基嗣位宗真妻臨朝則仁宗之弟婦也與隆緒
時異衆議每遣使但致書洪基使專達禮意其報亦如
之最為得體元祐初宣仁臨朝洪基亦英宗之弟因用
至和故事

禮逮事父母則諱王父母不逮事父母則不諱王父母
鄭氏以逮為及識當是有知之稱舊法祖父母私忌不
為假元豐編勅修假寧令於父母私忌假下添入逮事
祖父母者准此意謂生時祖父母尚存云爾然不當言
逮事蓋誤用禮之文也原為此法者謂生而祖父母死
則為不假存則為假所以別於父母也若謂逮事為及
見之辭則禮云不逮父母者今遺腹子固有不及見父
者矣而母則安有不及見者乎法初行安厚卿為樞密

適祖母忌祖母沒時厚卿纔二歲疑而以問禮部郎官何洵直洵直雖知法官之誤因欲遷就其說引子生三月而父名之以為天時一變為有識欲以三月為限斷過矣今士大夫凡生而祖父母存者皆告假從立法者之意也

唐以宣政殿為前殿謂之正衙即古之內朝也以紫宸殿為便殿謂之上閣即古之燕朝也而外別有含元殿古者天子三朝外朝內朝燕朝外朝在王宮庫門外有

非常之事以詢萬民於宮中內朝在路門外燕朝在路門內蓋內朝以見羣臣或謂之路朝燕朝以聽政猶今之奏事或謂之燕寢鄭氏小宗伯注以漢司徒府有天子以下大會殿為周之外朝而蕭何造未央宮言前殿則宜有後殿大會殿設於司徒府則為外朝而宮中有前後殿為內朝燕朝蓋去周猶未遠也唐含元殿宜如漢之大會殿宣政紫宸乃前後殿其沿習有自來矣方其盛時宣政蓋常朝日見羣臣遇朔望陵寢薦食然後

御紫宸旋傳宣喚仗入閣宰相押之由閣門進百官隨之入謂之喚仗入閣紫宸殿言閣猶古之言寢此御朝之常制也中世亂離宣政不復御正衙立仗之禮遂廢惟以隻日常朝御紫宸而不設仗敬宗始復修之因以朔望陳仗紫宸以為盛禮亦謂之入閣誤矣

唐正衙日見羣臣百官皆在謂之常參喚仗入閣百官亦隨以入則唐制天子未嘗不日見百官也其後不御正衙紫宸所見惟大臣及內諸司百官俟朝於正衙者

傳聞不坐即退則百官無復見天子矣敬宗再舉入閣禮之後百官復存朔望兩朝至五代又廢故後唐明宗始詔羣臣每五日一隨宰相入見謂之起居時李琪為中丞以為非禮請復朔望入閣之禮明宗曰五日起居吾思見羣臣不可罷朔望入閣可復遂以五日羣臣一入見中興便殿為起居朔望天子一出御文明前殿為入閣迄本朝不改元豐官制行始詔侍從官而上日朝垂拱謂之常參官百司朝官以上每五日一朝紫宸為

六參官在京朝官以上朔望一朝紫宸為朔參官遂為定制

古者天子之居總言宮而不名其別名皆曰堂明堂是也故詩言自堂徂基而禮言天子之堂初未有稱殿者秦始皇紀言作阿房甘泉前殿蕭何傳言作未央前殿其名始見而阿房甘泉未央亦以名宮疑皆起於秦時然秦制獨天子稱陛下漢有魯靈光殿而司馬仲達稱曹操范縝稱竟陵王子良皆曰殿下則諸侯王漢以來

皆通稱殿下矣至唐初制令惟皇太后皇后百官上疏稱殿下至今循用之蓋自唐始也其制設吻者為殿無吻不為殿矣

本朝未定六參之制百官日俟朝於前殿者便殿初引班常以四色官一人立垂拱門外亢聲唱前殿不坐及宰相便殿奏事畢即復出押百官虛拜於前殿庭下而散其宰相遇奏事日高皆不復押亦百官以序自拜於陛下而出韓魏公為相在位久遂更不押班王樂道為

中丞力擊之以為不臣其言雖過然當時議者猶以無故不押班為非禮故司馬君實代樂道以辰時二刻前朝退則押班過則免遂以為例

前世常患加役流法太重官有監驅之勞而配隸者有道路奔亡困踣之患蘓子容元豐中建議請依古置圜土取當流者治罪訖髡首鉗足晝夜居作夜則置之圜土滿三歲而後釋未滿歲而遇赦者不原既釋仍送本鄉譏察出入又三歲不犯乃聽自如崇寧中蔡魯公始

行之人不以為善也

集賢院學士故事初不分高下但以為名而品秩自從其官故吳正肅公以前執政資政殿大學士劉原甫以從官翰林侍讀學士皆以疾換授蓋不為要職也然在學士之列視待制則為優故元厚之以天章閣待制知南京仁宗即位亦特換授是歲遷龍圖閣直學士知廣州蘓子容罷知制誥知亳州再遇赦遂復此職嘗請別其品秩不報故其謝表云惟麗正圖書之府盛開元禮

樂之司在外館之地則為閑正學士之名則已重先朝
著令或自二府公台而踐更近例遷官皆由兩省丞郎
而兼領又云惟其恩數之優當有官儀之別亦嘗自言
於公府豈敢取必於僉諧

考其集賢院學士錢若水陳恕郭贄皆自前執政除
非獨吳正肅也呂祐之呂文仲李維盛度皆自翰林
學士晁迥自翰林學士承旨除非獨劉原甫也李行
簡自龍圖閣待制除非獨元厚之也又有自集賢院

學士除待制者陳升之李大臨陳繹曾布鄧綰沈括
豐稷皆是其除龍圖閣直學士者陳堯咨任布任中
師魏瓘呂居簡李東之李參孫長卿呂溱宋敏求皆
是亦非獨元厚之也鄧綰自御史中丞得罪元豐元
年正月復除待制則是時集賢院學士次於待制矣
蘇子容罷知制誥歲餘會恩知婺州亳州入勾當三
班院加集賢院學士此云罷知制誥而知亳州再遇
赦遂復此職非也

國朝講讀官初未有定制太宗始命呂文仲為侍讀繼而加翰林侍讀寓直於御書院文仲官著作佐郎但其本官班而已真宗初即位楊文莊公徽之為樞密直學士以老求罷徽之嘗為東宮官乃特置翰林侍讀學士以命之并授文仲夏侯嶠三人又以邢昺為翰林侍講學士始升其班次翰林學士祿賜並與之同設直廬於秘閣侍讀更直侍講長上

講讀官自楊文莊等後馮元魯宗道皆以龍圖閣直學

士兼侍讀高若訥以天章閣待制兼侍讀皆不加翰林及學士之名讀官初無定職但從講官入侍而已宋宣獻夏文莊為侍讀學士始請日讀唐書一傳仍恭釋義理後遂為定制

考異馮元魯宗道皆兼侍講此云侍讀非也

唐有翰林侍書學士柳公權嘗為之太祖平蜀王著蜀人善書為趙州隆平縣主簿或薦其能書召為衛尉寺丞史館祇候使詳定急就章等後遂以為翰林侍書而

不加學士之名蓋惜之也自著後不復除人著後官亦不顯有翰林學士王著者自別一人非此人也王君玉琪為館閣校勘晏元獻以前執政留守南京辟為簽書留守判官公事詔特令帶舊職從之館職外除自君玉始

神宗初欲為韓魏公神道碑王禹玉為學士密詔禹玉具故事有無禹玉以唐太宗作魏徵碑高宗作李勣碑明皇作張說碑德宗作段秀實碑及本朝太宗作趙普

碑仁宗作李用和碑六事以聞於是御製碑賜魏公家
或云即禹玉之辭也

唐制門下省有弘文館中書省有集賢殿書院皆以藏
圖書弘文館即修文館也武德初置設生徒使習書選
京官五品以上為學士六品以上為直學士及使他官
領直館武后垂拱後以宰相兼領館務中宗景龍中置
大學士至開元初乾元殿寫四部書置乾元院後改麗
正修書院又改集賢直學士等官畧如弘文自是宰相

比帶弘文集賢大學士遂為故事

梁遷都汴貞明中始於右長慶門東北設屋十餘間謂之三館蓋昭文集賢史館也初極卑隘太宗太平興國中更命於左昇龍門裏舊車輅院地改作置集賢書於東廡昭文書於西廡史館書於南廡賜名崇文院猶未有秘書省也端拱中始分三館書萬餘卷別為秘閣命李至兼秘書監宋泌兼直閣杜鎬兼校理三館與秘閣始合為一故謂之館閣然皆有書庫而已元豐官制

行遂改為秘書省

唐貞觀初始置史館於門下省以他官兼領秩卑者以
為直館宰相莅修撰開元中李林甫為監修國史始遷
於中書省復置史館修撰迄五代遂為故事本朝乾德
初首以趙韓王監修國史修撰之外復有編修校勘
書校勘編修隨時創制不一舊但以書庫吏抄錄報狀
論次其後遂命進奏院及諸司凡詔令等皆關送開寶
後命中書樞密皆書時政記以授史官淳化中張秘請

別置起居院為左右史之職以梁周翰李宗諤為之凡長春崇德殿宣諭陳列事中書以時政記記之樞密院則本院記之其餘百司封拜除授沿革制置等事皆悉記錄月終送史館而起居郎舍人分直崇政殿別記言動為起居注元豐官制行左右史所書如舊各為廳於兩後省史館歸之著作局國史院有故則置假左散騎常侍廳為之而後始以宰相監修

梁改樞密院為崇政院因置直崇政院唐莊宗復舊名

遂改為樞密院直學士至明宗時安重誨為樞密使明宗既不知書而重誨又武人故孔循始議置端明殿學士二人專備顧問以馮道趙鳳為之班翰林學士上蓋樞密院職事官也本朝樞密院官既備學士之職浸廢然猶會食樞密使廳每文德殿視朝則升殿侍立亦不多除人官制行乃與學士皆為職名為直學士之冠不隸樞密院升殿侍立為樞密都承旨之任每吏部尚書補外除龍圖閣學士戶部以下五曹則除樞密直學士

相呼謂之密學

元昊請和歐公具當時議論有三一曰天下困矣不和則不能支少屈就之可以紓患一曰羌夷險詐雖和而不敢罷兵則與不和無異是空包屈就之羞全無紓患之實一曰自屈志講和之後退而休息練兵訓卒以為後圖三說皆力破之以為不和害少和則害多因言方今不着屈志急欲就和之人其類有五不忠於陛下者欲急和謂數年以來廟堂勞於幹運邊鄙勞於戎事苟

欲避此勤勞自偷目下安逸他時後患任陛下獨當也
無識之人欲急和謂和而偷安利在目下和後大患伏
而未發也姦邪之人欲急和謂寬陛下以太平無事而
望聖心怠於庶事因欲進其邪佞惑亂聰明也疲兵懦
將欲急和謂屢敗之軍不知得人則勝但懼賊來常敗
也陝西之民欲急和謂其困於調發誅求也五者惟陝
西之民可因宣撫使告以朝廷非不欲和而賊未遜順
之意其餘可一切不聽使大議不沮而善算有成

本朝宰相自建隆元年至元祐四年一百三十年凡五
十人自元祐五年至今紹興六年四十六年凡二十八
人幾倍於前也

故事制科分五等上二等皆虛惟以下三等取人然中
選者亦皆第四等獨吳正肅公嘗入第三等後未有繼
者至嘉祐中蘇子瞻子由乃始皆入第三等已而子由
以言太直為考官胡武平所駁欲黜落復降為第四等
設科以來止吳正肅與子瞻入第三等而已故子瞻謝

啟云誤占久虛之等

官制行內兩省諸廳照壁自僕射而下皆郭熙畫樹石
外尚書省諸廳照壁自令僕而下皆待詔書周官蘇子
容時為吏部侍郎謝幸省進官表云三朝漢省已叨過
輦之恩六典周官願謹書屏之戒

元豐間三佛齊注輦國入貢請以所貢金蓮花真珠龍
腦依其國中法親撒於御座謂之撒殿詔特許之御延
和殿引見使跪撒於殿柱外前未有也注輦在廣州南

水行約四千里至廣州三佛齊南蠻別種與占城國為鄰

國朝三公官未始兼備惟元豐末年文潞公守太尉雍王曹王守司空富鄭公曹濟陽守司徒皆同一時其後宣和間蔡魯公為太師王將明為太傅鄭達夫為太保方相繼兩見

元豐三年高麗入貢有日本國車一乘正使柳洪副使朴寅亮先致意館伴官云諸侯不貢車服誠知非禮但

本國欲中朝畧見日本工拙爾詔特許進

內香藥庫在謬門外凡二十八庫真宗賜御製七言二
韻詩一首為庫額曰每歲沉檀來遠裔累朝珠玉實皇
居今辰內府初開處充牣尤宜史筆書

唐正衙宣政殿庭皆植松開成中詔入閣賜對官班退
立東階樹下是也殿門外復有藥樹元微之詩云松
間待制應全遠藥樹監搜可得知自晉魏以來凡入殿
奏事官以御史一人立殿門外搜索而後許入謂之監

搜御史立藥樹下至唐猶然太和中始罷之

考異宣政殿庭東西有四松非皆植松也詔書乃開成元年正月賜對當作次對唐制百官入宮殿門必搜非止為奏事官也藥樹有監搜御史監搜位非泛用御史一人亦非立也太和元年詔今後坐朝衆僚既退宰臣復進奏事其監搜宜停止謂宰臣勿搜非皆罷也

高麗自端拱後不復入貢王徽立嘗誦華嚴經願生中

國舊俗以二月望張燈祀天神如中國上元歲一夕夢
至京師觀燈若宣召然徧呼國中嘗至京師者問之畧
皆夢中所見乃自為詩識之曰宿業因緣近契丹一年
朝貢幾多般忽蒙舜日龍輪召便侍堯天佛會觀燈燭
似蓮丹闕迴月華如水碧雲寒移身幸入華胥境可惜
終宵漏滴殘會神宗遣海商喻旨使來朝遂復請修故
事余館伴時見初朝張誠一館伴語錄所載云爾

乾
坤
艮
巽
坎
離
震
兌

欽定四庫全書

子部

石林燕語卷三
四

詳校官中書臣葉元符

員外郎臣牛稔文覆勘

郎中臣丁雲錦覆勘

謄錄監生臣單可彝

欽定四庫全書

石林燕語卷三

宋

葉夢得

撰

宇文紹奕 考異

唐舊事門狀清要官見宰相及交友同列往來皆不書前銜止曰某謹祇候某官謹狀其人親在即曰謹祇候某官兼起居謹狀祇候起居不並稱各有所施也至於府縣官見長吏諸司僚屬見官長藩鎮入朝見宰相及

臺參則用公狀前具銜稱右某謹祇候某官伏聽處分牒件狀如前謹牒此乃申狀非門狀也元豐以前門狀尚帶牒件狀如前等語蓋沿習之久後雖去而祇候起居並稱猶不改今從官而上於某官下稱謹狀去伏候裁旨四字畧如唐制而具前銜謂之小狀他官則前銜與前四字兼具而不言謹狀不知有牒件狀如前謹牒七字則謹狀字自不應重出若既去此七字則當稱謹狀以為恭而反簡自元豐以來失之也

太平興國中司天言太一式有五福大游小游四神天
一地一真符君暴臣暴民暴凡十神皆天之貴神而五
福所臨無兵疫凡行五宮四十五年一易今自甲申歲
入黃室巽宮當吳分請即蘇州建宮祠之已而復有言
今京城東南有蘇村可應姑蘇之名乃改築於蘇村京
師建太一宮自此始

樞密使拜罷舊皆用麻皇祐中狄武襄嶺南成功迴高
文莊若訥為使罷為羣牧制置使武襄自副使補其闕

止令舍人院草辭自是遂為故事

唐起居郎舍人皆隨宰相入殿預聞奏事仗在紫宸則立殿下直第二螭頭即其坳處和墨以記事故號螭頭或曰螭坳自高宗後前殿不奏事則二史固無所書矣本朝記注初不侍立但於前後殿為次使候上殿臣寮退面問所嘗言書之然未嘗有敢告之也後始詔後殿輪日入侍崇寧初鄭丞相達夫為史官復建言併前殿皆入並立於堦殿雖存故事而奏對語畧不相聞亦不

敢自書惟經筵與講讀官並列嘉祐間賈直孺所請也
太祖初平諸偽國得其帑藏金帛以別庫儲之曰封
樁庫本以待經營契丹也其後三司歲終所用常賦有
餘亦併歸之嘗諭近臣欲候滿三五百萬即以與契丹
以贖幽燕故土不從則為用兵之費蓋不欲常賦橫歛
於民故不隸於三司今內藏庫是也

狨坐不知始何時唐以前猶未施用太平興國中詔工
商庶人許乘烏漆素鞍不得用狨毛暖坐則當時蓋通

上下用之矣天禧元年始定兩省五品宗室將軍以上許乘狨毛暖坐餘悉禁遂為定制令文臣自中書舍人以上武臣節度使以上方許用而宗室將軍之制亦不行矣

考異太平興國七年翰林學士承旨李昉等奏商賈庶人有僭乘銀裝鞍勒狨毛暖坐等請禁斷從之當時以為僭則非通上下用之矣今著令諫議大夫以上及節度使曾任執政官者許乘狨坐此云文臣中

書舍人以上武臣節度使以上方許用非也

參知政事班舊不與宰相同行至道中呂正惠公與寇萊公同為參知政事正惠先相恐萊公意不平乃請進與宰相同行萊公罷復如舊

服色凡言賜者謂於官品未合服而特賜也故職事官服紫雖侍從以上官未當其品亦皆言賜若官當其品雖非侍從如磨勘告便不帶賜矣告不帶賜則亦不當入街近見士大夫有悞以賜為正服之名雖官及品而

銜猶沿習言賜此不惟不知所應服亦自讀其告不審也

郭進守雄州太祖令有司造第於御街之東欲以賜之使盡用甌瓦有司言非親王公主例不應用太祖大怒曰進為我捍契丹十餘年使我不憂西北豈不可比我兒女卒用之宅成以賜進屢辭乃敢受太平興國中始別賜進宅或以為因展修相國寺併入為寺基也

祖宗駙馬都尉宅主薨例皆復納入官或別賜第曹沂

王宅許懷德舊第也李和文宅亦王貽永舊第自和文始世有之宏麗甲諸主第園池尤勝號東庄和文好賢樂士以楊文公為師友其子孫多守家法一時名公卿率從之游宣和間復取為擷芳園後改崇德宮以居寧德皇后云

哲宗元祐初春秋尚少淵嘿未嘗語一日經筵司馬康講洪範至又用三德忽問只此三德為更有德君平臣聳然康言三德雖少然推而廣之天下事無不皆在上曰

然

太宗留意字書淳化中嘗出內府及士大夫家所藏漢
晉以下古帖集為十卷刻石于秘閣世傳為閣帖是也
中間晉宋帖多出王貽永家貽永祁公之子國初藏名
書畫最多真蹟今猶有為李駙馬公炤家所得者實為
奇蹟而當時摹勒出待詔手筆多凝滯間亦有偽本如
李斯書乃李陽冰王密德政碑石本也石後禁中被火
焚絳人潘師旦取閣本再摹藏於家為絳本慶歷間劉

丞相沆知潭州亦令僧希白摹刻於州廨為潭本絳本
雜以五代近世人書微出鋒希白自善書潭本差能得
其行筆意元祐間徐王府又取閣本刻於木板無甚精
彩建中靖國初曾丞相布當國命劉燾為館職取淳化
所遺與近出者別為續法帖十卷字多作燾體又每下
矣

考異淳化官帖黃魯直秦少游所記皆云板刻此乃
云刻石非也魯直云元祐中親賢宅從禁中借板墨

百本分遺宮僚此云徐王府取閣本刻於木板豈各
自一事耶續法帖跋云元祐五年四月十三日祕書
省請以祕閣所藏墨跡未經太宗朝摹刻者刊於石
有旨從之至建中靖國元年四月二十三日出入藏
緡錢十五萬趣其工以八月旦日畢釐為十卷上之
此乃云曾丞相當國命劉燾別為續法帖十卷非也
楊文公以工部侍郎卒舊制四品不應得謚王文康公
為樞密使明其嘗與寇萊公共議請皇太子決事以其

家奏草上聞遂特賜謚李獻臣當制畧曰天禧之末政
漸宮闈能叶元臣議尊儲極文康萊公壻也

張僕射齊賢為相時其母晉國夫人年八十餘尚康強
太宗方眷張時召其母入內親歎如家人余嘗於張氏
家見賜其母詩云往日貧儒母年高壽太平齊賢行孝
侍神理甚分明又一手詔云張齊賢拜相不是今生宿
世遭逢本性於家孝事君忠婆婆老福見兒榮貴祖宗
誠意待大臣簡質不為飾蓋如此也

宣徽南北院使唐末舊官也置院在樞密院之北總內諸司及三班內侍等事國初與樞密先後入叙班蓋視二府一等也每除樞密先為使者必辭請居其下而後從之熙寧間始詔定班樞密副使下元豐官制行猶存不廢自王拱辰改除節度使遂罷不除元祐間復置以命張安道後亦廢

燕樂教坊外復有雲韶班鈞容直二樂太祖平嶺表得劉氏闈官聰慧者八十人使學於教坊賜名蕭韶部後

改今名鈞容直軍樂也太平興國中擇軍中善樂者初
曰引龍直以備行幸騎道淳化中改今名皆與教坊參
用元豐後又有化成殿親事官

唐中書制詔有四封拜冊書用簡以竹為之畫旨而施
行者曰發曰勅用黃麻紙承旨而行者曰勅牒用黃藤
紙赦書皆用絹黃紙始貞觀間或云取其不蠹也紙以
麻為上藤次之用此為重輕之辨學士制不自中書出
故獨用白麻紙而已因謂之白麻今制不復以紙為辨

號為白麻者亦池州楮紙耳曰發曰勅蓋今手詔之類而勅牒乃尚書省牒其紙皆一等也

職事官差除皆除目先下惟中書舍人宰相得旨朝退遣直省官召詣都堂面傳旨召試被命者致辭宰相謝之直省官徑引入中書省前期侍郎廳設幕次几案於中就坐少頃本省吏房主首持宰相封題目來即就試中書具食罷侍郎致茶果是日宰相住省俟納試卷始上馬翌日進呈除命方下蓋召試之制也有思遲不即

就者往往過期或為留內門然已不稱職矣嘉祐間有
試而不除改天章閣待制者

考異咸平中黃夷簡曾致堯皆試而不除嘉祐七年
司馬溫公既試除知制誥力辭改天章閣待制黃曾
雖試而不除非改待制也溫公雖改待制非試而不
除也

韓門下維以賜出身熙寧末特除翰林學士崇寧中林
彥振賜出身用韓例亦除翰林學士國朝以來學士不

由科第除者唯此二人

唐制翰林學士本職在官下五代趙鳳為之始諷宰相任園移在官上後遂為定制本朝凡兼學士結銜皆以職名為冠蓋沿習此例

考異趙鳳乃端明殿學士此云翰林學士非此書第四卷亦云趙鳳為端明殿學士云兼學士非兼也此云本朝凡兼學士結銜皆以職名為冠第四卷又云唐以宰相兼昭文館集賢殿學士結銜皆在官下蓋

兼職宜然本朝循用其舊云云前後未免抵牾

自兩漢以來謂中書為政本蓋中書省出令而門下省覆之王命之重莫大於此故唐以後以同中書門下平章事為宰相者此也尚書省但受成事而行之耳本朝沿習唐制官制行始用六典別尚書門下中書為三省各以其省長官為宰相則侍中中書尚書令是也既又以秩高不除故以尚書令之貳左右僕射為宰相而左僕射兼門下侍郎以行侍中之職右僕射兼中書侍郎

以行中書令之職而別置侍郎以佐之則三省互相兼
矣然左右僕射既為宰相則凡命令進擬未有不由之
出者而左僕射又為之長則出命令之職自己身行尚
何省而覆之乎方其進對執政無不同則所謂門下侍
郎者亦預聞之矣故批旨皆曰三省同奉聖旨既已奉
之而又審之亦無是理門下省事惟給事中封駁而已
未有左僕射與門下侍郎自駁已奉之命者則侍中侍
郎所謂省審者殆成虛文也元祐間議者以詔令稽留

吏員冗多徒為重複因有併廢門下省之意後雖不行然事有當奏稟左相必批送中書左相將上而右相有不同往往或持之不上或退送不受左相無如之何侍郎無所用力事權多在中書自中書侍郎遷門下侍郎雖名進其實皆未必樂也

考異此云唐以後以同中書門下平章事為宰相後又云唐參知乃宰相而平章乃參佐之名秦漢至唐有官名雖相沿而實不同者尚書秦官漢武帝使宦

者典事尚書謂之中書故蕭望之謂中書政本又云尚書百官之本宜罷中書宦官也至成帝乃罷中書宦者置尚書魏武帝為魏王置秘書令典尚書奏事文帝改為中書令此云自兩漢以來謂中書為政本中書省出令而門下省覆之又云尚書省但受成事行之蓋漢魏所謂尚書中書者本出於一旦初未有門下省今乃以歷代官名職制混而言之非也

故事職事官以告老得謝受命即行不入謝辭為其致

為臣而去也神宗初李少保東之自侍讀致仕上特召對延和殿命坐賜茶退偕講讀官燕餞於資善堂後數日李侍郎受繼去亦用東之故事召對賜燕二人皆英宗經筵舊臣故禮之特厚非常例也當時謂之二李東之文定公子素忠謹樂易受亦謹慎長者云

景祐中宗莒公為知制誥仁宗眷之厚即除同知樞密院事時王沂公為相以故事未有自知制誥除二府者乃改翰林學士明年遂除叅知政事

唐叅議朝政叅議政事叅知機務叅知政事皆宰相之任也叅知政事蓋劉洎為相時名唐初宰相未有定名因人而命皆出於臨時其後高宗欲用郭待舉為叅知政事以其資淺故命於中書門下同受進止平章事叅知非叅佐也蓋宰相非一人猶言共知爾而平章乃叅佐之名本朝太祖始以趙中令獨相久欲拜薛文惠公等為之副而難其名召學士陶穀問下丞相一等有何官穀以唐有叅知政事對遂以命之不知此名本自高

於平章事輕重失倫後遂沿習莫能改云

本朝以科舉取士得人為最盛宰相同在第一甲者王文正榜王文忠宋莒公榜曾魯公王伯庸榜韓魏公文潞公劉輝榜劉莘老章子厚葉祖洽榜蔡魯公趙正夫惟楊寘榜王禹玉韓子華王荆公三人皆又連名前世未有也自熙寧三年余中榜至今惟焦蹈榜徐擇之一人而已他榜亦未有登執政者

元豐末文潞公致仕歸洛入對時年幾八十矣神宗見

金史卷之三
卷三
其康強問卿攝生亦有道乎潞公對無他臣但能任意
自適不以外物傷和氣不敢做過當事酌中恰好即止
上以為名言

館職初除故事皆行啓徧謝內外從官以上從官惟中
書舍人初除亦行啓徧謝內外蓋惟此兩職試而後除
與直拜命者異故其禮亦殊近年中書舍人行啓但及
見任執政而不及外館職雖在內從官亦有不及者矣
三衙內見宰執皆橫杖子文德殿後主廊階下唱喏宰

執出笏階上揖之外遇從官於通衢皆歛馬避歛馬之制久廢前輩記之矣惟內中橫杖子之禮迄今不敢廢也

舊制幘頭巾皆折而歛前神宗嘗謂近臣此製有承上之意紹聖後始有改而偃後者一時宗之謂前為歛巾遂不復用此雖非古服隨時之好然古者為冕皆前俯而後仰歛巾尚有遺意也

元豐既新官制四十年間職事官未有不經除者惟御

史大夫左右散騎常侍至今未嘗除人蓋兩官為臺諫之長非宰執所利故無有啓之者或云元豐末黃安中為中丞久次神宗欲擢為常侍會寢疾不果崇寧中朱聖子為中丞嘗請除二官竟不行

唐制降勅有所更改以紙貼之謂之貼黃蓋勅書用黃紙則貼者亦黃紙也今奏狀劄子皆白紙有意所未盡揭其要處以黃紙別書於後乃謂之貼黃蓋失之矣其表章畧舉事目與日月道里見於前及封皮者又謂之

引黃

舊大朝會等慶賀及春秋謝賜衣請上聽政之類宰相率百官奉表皆禮部郎官之職唐人謂之南宮舍人元豐官制行謂之知名表郎官禮部別有印曰知名表印以其從上官一人掌之大觀後朝廷慶賀事多非常例郎官不能得其意蔡魯公乃命中書舍人雜為之既又不欲有所去取於是叅取首尾或摘其一兩聯次比成之故辭多不倫當時謂之集句表禮部所撰惟春秋兩

謝賜衣表而已

後唐明宗嘗入倉觀受納主吏懼責其多取乃故為輕量明宗曰倉廩宿藏動經數歲若取之如此後豈免銷折乎吏因訴曰自來主藏者所以至破家竭產以償欠正為是明宗惻然乃詔自今石取二升為雀鼠耗至今行之所謂加耗者是也明宗知恤吏矣不知反墮其計中遂為民害近世立盤量出剩法本防吏姦而州縣貪暴者因以歛民至於倍蓰以其正數上供及應監司之

求而留出剩以自給監司知之亦不問加耗又不足言也

唐至五代國初京師皆不禁打織五代始命御史服裁帽本朝淳化初又命公卿皆服之既有織又服帽故謂之重戴自祥符後始禁惟親王宗室得打織其後通及宰相樞密叅政則重戴之名有別矣今席帽裁帽分為兩等中丞至御史與六曹郎中則於席帽前加全幅皂紗僅圍其半為裁帽非臺官及自郎中而上與員外而

下則無有為席帽不知何義而裁與席之名亦不可曉
宋次道記金帶曾經賜者皆許繫宰相罷免雖散官並
依舊服笏帶因宣獻公為學士以玉清昭應宮災落職
為中書舍人仍繫遇仙花帶李文定天聖中自秘書監
來朝除刑部侍郎仍繫笏頭帶以為經賜許服景祐中
著於詔令近歲前執政官到闕止繫遇仙花帶從官非
見帶學士亦不敢繫待制自如本品無職則隨本官在
庶官班中皆繫皂帶蓋閣門之制不知衝改始何時余

建炎中召至揚州行在以杭州變罷職官朝請大夫親
如上制

元豐以後待高麗之禮特厚所過州皆旋為築館別為
庫以儲供帳什物始至太守皆郊迓其餞亦如之張安
道知南京獨曰吾嘗班二府不可為陪臣屈乃使通判
代將迎已受謁而後報時以為得體大觀中蔡元度知
鎮江高麗來朝遂亦用安道例

契丹歷法與本朝素差一日熙寧中蘇子容奉使賀生

辰適遇冬至本朝先契丹一日使副欲為慶而契丹館伴官不受子容徐曰歷家遲速不同不能無小異既不能一各以其日為節致慶可也契丹不能奪遂從之歸奏神宗喜曰此事難處無踰於此其後奉使者或不知此遇朔日有不同至更相推謁而不受非國體也

考異此云熙寧中第九卷云元豐中此云冬至本朝先契丹一日第九卷云契丹歷先一日此云使副欲為慶契丹館伴官不受第九卷云契丹趣使者入賀

皆前後抵牾按蘇墓誌云熙寧十年冬至本朝歷先契丹一日敵疑彼此致慶當孰從公言各從本朝歷可也

給事中中書舍人雖皆四品給事中自服緋除受告日便自易服蓋品應得也惟中書舍人必俟後殿正謝面賜乃易服後殿不常坐或待數日則或緋或綠猶仍其舊服祖宗時知制誥皆然而亦有不賜者李憲成公誥自知制誥出守荆南尚服緋以學士召還併賜紫而後

服金帶是也

國朝選人寄祿官凡四等七資留守節察判官掌書記
支使防團判官留守節察推官軍事判官為兩使職官
防團軍事推官軍監判官為初等職官司錄縣令知縣
為令錄軍巡判官司理司戶司法簿尉為判司簿尉其
陞遷之序則自判司簿尉舉令錄遷令錄舉職官遷初
等職官自職令薦書及格皆改京官不及格而有二薦
書則遷兩使職官謂之短般以勞叙賞謂之循資崇寧

中鄧樞密洵武建言以為名實混淆不正乃改今七等
名

欽定四庫全書

石林燕語卷四

宋 葉夢得 撰

宇文紹奕 考異

官制寄祿官銀青光祿大夫與光祿正議中散朝議皆分左右朝議中散有出身人皆超右其餘並以序遷大觀中余為中書舍人奉詔以為非元豐本意下擬定釐正乃參取舊名以奉直易右朝議中奉易左中散通奉

易右正議正奉易右光祿宣奉易左光祿而右銀青光祿大夫正為光祿大夫遂為定制

故事百官磨勘中書止用定辭熙寧中孫巨源為知制誥建言君恩無高下何獨於磨勘簡之非所以重王命也乃詔各為辭元豐官制行惟侍從官而上吏部檢舉奏抄命辭他官自陳於吏部奏抄擬遷而不命辭

國朝兩制皆避宰相執政官親曾魯公修起居注賈文元為相其友壻也當召試乃除天章閣待制文元去位

始為知制誥劉原甫王文定之甥文定之為參知政事
乃以侍讀學士出知揚州宋子京王原叔為翰林學士
子京避莒公改龍圖閣學士原叔避文安改侍讀學士
元祐間蘇子由秉政子瞻自揚州召為承旨引原叔例
請補外不從近歲惟避本省官如宰相二丞親則不除
尚書侍郎門下侍郎親則不除給事月中書侍郎親則
不除舍人之類六曹尚書避親多除翰林學士蓋於三
省無所隸異於舊制自子瞻以來然也

大駕儀仗通號鹵簿蓋已獨斷已有此名唐人謂鹵櫓也甲楯之別名凡兵衛以甲楯居外為前導捍蔽其先後皆著之簿籍故曰鹵簿因舉南朝御史中丞建康令皆有鹵簿為君臣通稱二字別無義此說為差近或又以鹵為鼓簿為部謂鼓駕成於部伍不知鹵何以謂之鼓又謂石季龍以女騎千人為一鹵部簿乃作部皆不可曉今有鹵簿記宋宣獻公所修審以部為簿籍之簿則既云簿不應更言記

唐制節度使加中書門下平章事為使相自郭元振始
李光弼等繼之蓋平章事宰相之名以節度使兼故云
爾也國朝因之元豐官制罷平章事名而以開府儀同
三司易之亦帶節度使謂之使相蓋以儀同為相也

唐書言大臣初拜官獻食天子名曰燒尾蘇瓌為相以
食貴百姓不足獨不進然唐人小說所載與此不同乃
云士子初登科及在官者遷除朋僚慰賀比盛置酒饌
音樂燕之為燒尾舉韋嗣立入三品趙彥昭假金紫崔

湜復舊官中宗皆令於興慶池燒尾則非獻食天子也
其解燒尾之義以為虎豹化為人惟尾不化必以火燒
之乃成人猶人之新除必樂飲燕客乃能成其榮其言
迂誕無據然謂太宗已嘗問朱子奢則其來蓋已久矣
近世獻食天子固無是而朋僚以音樂燕集亦未之講
也

慶歷五年賈文元為相始建議重修唐書詔以判館閣

王文安宋景文楊宣懿

察

趙康靖

舉

及張文定余襄公

為史館修撰刊修未幾諸人皆以故去獨景文下筆已而景文亦補外乃許以史藁自隨編修官置局於京師者仍舊遇有疑議取證則移文於局中往來迂遠書久不及成是時歐陽文忠公非文元所喜且方貶出獨不得預嘉祐初文忠還范蜀公為諫官乃請以紀志屬文忠至五年書始成初文元以宰相自領提舉官及罷去陳恭公相辭不領乃命叅知政事王文安訖奏書亦曾魯公以叅知政事領也

從駕謂之扈從始司馬相如上林賦云扈從橫行出乎
四校之中晉灼以扈為大張揖謂跋扈縱橫不案鹵簿
故顏師古因之亦以為跋扈恣縱而行果爾從蓋作平
聲侍天子而言跋扈可乎唐封演以為扈養以從猶之
僕御此或近之然不知通用此語自何時也

唐自明皇以誕日為千秋節其後肅宗為地平天成節
至代宗羣臣請建天興節不報自是歷德順憲穆敬五
帝皆不為節文宗太和中復置慶成節故武宗為慶陽

節終唐世宣宗為壽昌節僖宗為嘉會節昭宗為乾和
節中間惟懿宗不置則唐世此禮亦不常各係其時君
耳千秋節詔天下咸燕樂有司休務三日其餘凡建節
皆以為例穆宗雖不建節而紫宸殿受百官稱賀命婦
光順門賀皇太后及有麟德殿沙門道士儒官討論三
教之制文宗時又嘗禁屠宰燕會惟蔬食脯醢後旋仍
舊

熙寧初改經義取士興建太學記 崇寧罷科賦每榜

魁南省皆迭為得失始余中榜邵剛魁得次徐鐸榜

宋按

史及馬氏文獻通考俱作徐鐸舊本鐸訛作驛今改正

余幹落時彥榜黃中魁得

次黃裳榜侯綬落惟焦蹈榜陶直夫落差一榜次七榜

李常寧車漸李益

按馬氏文獻通考作李益咸淳毘陵志作李奎舊本作益未詳孰是今仍

原文蔡嶷榜章綽李朴蔡靖陳國林皆得馬涓何昌言霍

端友榜費元量王瞻陳賓皆落不差一人亦可怪也時

謂之雌雄解元

兩京留臺皆有公字亦榜曰御史臺舊為前執政重臣

休老養疾之地故例不視事皇祐間吳正肅公為西京
留臺獨舉其職時張堯佐以宣徽使知河南府郡政不
當有訴於臺者正肅即為移文詰之堯佐惶恐奉行不
敢異其後司馬溫公熙寧元豐間相繼為者十七年雖
不甚預府事然亦守其法令甚嚴如國忌行香等班列
有不肅亦必繩治自創置宮觀後重臣不復為率用常
調庶官比宮殿給使請俸差優爾朝廷既但以此為恩
故來者奔走府廷殆與屬吏無異矣

國朝侍從官間有換武職者蓋唐袁滋故事例皆換觀察使如李尚書維自承旨李左丞衡自三司使皆然天聖間陳康肅以翰林學士知開封府亦換宿州觀察使加檢校司徒知天雄軍陳不樂行力辭明肅后以隻日御朝而喻之曰天雄朔方會府敵人視守臣為輕重非文武兼材不可陳不得已受命自是加留後遂建節慶曆中陝西用兵韓魏公范文正公龐莊敏公為帥皆以龍圖閣直學士換觀察使文正懇辭不拜蓋當權者實

欲排之而以俸優為言故文正不肯受已而韓龐亦辭
遂罷

臣僚上殿劄子未槩言取進止猶言進退也蓋唐日輪
清望官兩員於禁中以待召對故有進止之辭崔祐甫
奏待制官候奏事官盡然後趨出於內廊賜食待進止
至酉時放是也今乃以為可否取決之辭自三省大臣
論事皆同一體著為定式若爾自當為取聖旨蓋沿習
唐制不悟也

唐武德初以太宗為西討元帥自是非親王不為安祿山叛以哥舒翰守潼關除諸道兵馬元帥始以臣庶為之至德初代宗以廣平王為天下兵馬元帥以郭子儀為副其後又以舒王謨為荆南等道節度諸軍行營都元帥加都字自是始此皆實領兵柄唐末以授錢鏐則姑以名寵之爾

唐乾元中以戶部尚書李峘為都統淮南江東江西節度使始立都統之號其後以節度使充者建中二年李

勉以汴州節度使充汴宋滑毫河陽等道都統是也宰
相充者中和二年王鐸以司徒中書令為京城四面諸
道行營兵馬都統是也

高麗自三國以來見於史者句驪其國號高其姓也隋
去句字故自唐以來止稱高麗五代史記後唐同光元
年韓申來其王尚姓高則自三國至五代止傳一姓長
興中始稱權知國事王建王氏代高當在同光長興之
間而史失其傳元豐初王徽遣使金梯入貢建之七世

孫也其表章稱知國王事蓋習用其舊而年稱甲子以其受契丹正朔故也

唐以宰相兼昭文館集賢殿學士結銜皆在官下蓋兼職宜然本朝循用其舊而他學士則皆冠於官上此自五代趙鳳為之也始後唐置端明殿學士以命鳳及馮道後鳳遷禮部侍郎因懇宰相任園升學士於官上蓋自示其貴重故本朝觀文殿大學士而下皆以為例亦世以職為重故爾若宰相則所貴不待職也

樞密使唐書五代史皆不載其創始之因蓋在唐本宦者之職唐中世後宦人使名如是者多殆不勝記本不係職官重輕而五代特因唐名而增大之故史官皆不暇詳考據續事始云代宗永泰中以中人董秀管樞密因置內樞密使續事始為蜀馮鑑所作也

唐翰林學士結銜或在官下無定制余家藏唐碑多如太和中華藏用碑撰者言中散大夫守尚書戶部侍郎知制誥翰林學士王源中之類則在官下大中中王巨

鋪碑撰者言翰林學士中散大夫守中書舍人劉瑒之類則在官上瑒仍不稱知制誥殊不可曉不應當時官名而升降龐雜乃爾也

尚書省文字下六司諸路例皆言勘會曾魯公為相始改作勘當以其父名會避之也京師舊有平準務自漢以來有是名蔡魯公相以其父名準亦改為平貨務

唐舊制集賢書藏於門下省永泰後以勲臣罷節制歸京師者無職事欲以慰其意乃詔與儒臣日並於集賢

院待制仍賜錢三千緡為食本以給其費於是郭英又
孫志直臧希讓高昇王延昌與裴遵慶暢瓊崔渙賈至
李季卿吳令珪等十一人皆在選待制之名於此蓋無
別於文武余有裴士淹所作孫志直碑待制給食入銜
此出一時權宜後不以為常故唐書載之不詳

向傳範欽聖太后之叔也在神宗時已為觀察使歷知
陝州滄州矣神宗即位徙知鄆州楊繪知諫院言鄆州
領京東西路安撫使不宜以后族為之文潞公在樞府

因稱傳範在先朝已累典大郡今用非以外戚上徐曰
得諫官如此言亦甚好可以止他日妄求者乃移知潞
州祖宗用人無私雖以材選而每不忘後世之戒如此
婕妤史記索隱訓婕為承好為佐字本皆從人大抵古
人取訓各以其意適然者而字多從省蓋便捷也乃相
承敏捷之意字從省去才仔為相予則訓佐理亦宜然
後以為婦職因易人為女耳

元豐既新官制建尚書省於外而中書門下省樞密學

士院設於禁中規模極雄麗其墜壁屏下悉用重布不
紙糊尚書省及六曹皆書周官兩省及後省樞密學士
院皆郭熙一手畫中間甚有傑然可觀者而學士院畫
春江曉景為尤工後兩省除官未嘗足多有空閑處看
守老卒以其下有布往往竊毀盜取徐擇之為給事中
時有竊其半屏者欲付有司會竊處有刃痕議者以禁
廷經由株連所及多遂止然因是毀者浸多亦可惜也
古者婦人無名以姓為名或係之字則如仲子季姜之

類或繫之謚則如戴媯成風之類各不同周人稱王姬伯姬蓋周姬姓故云而後世相承遂以姬為婦人通稱以戚夫人為戚姬虞美人為虞姬自漢以來失之政和間改公主而下名曰帝姬族姬此亦沿習熟慣而不悟國姓自當為嬴余嘗以白蔡魯公憚於改作而止

曾宣靖公提舉修英宗實錄成將上故事當遷一官曾官已左僕射乃豫辭於上曰臣官進一等則為司空此三公之職也坐而論道不可以賞勞神宗以為誠遂從

其請書上曾獨不遷官人以為得體

考異時韓忠獻進仁宗實錄曾宣靖進英宗實錄韓
奏竊見宰臣李沆呂夷簡提舉編修太宗實錄及三
朝國史並乞書成更不推恩皆蒙上俞允云云曾言
若遷官臣須改司空韓琦須改太保三公亦非賞勞
之官遂皆許之然則其同時有韓其異時有李呂今
止記曾豫辭於上而云獨曾不遷官人以為得體非
也

治平初議濮廟者六人呂獻可為中丞呂微仲范堯夫
趙大觀傅欽之與龔鼎臣為御史既同時相繼被貶天
下號六御史

唐人初未有押字但草書其名以為私記故號花書韋
陟五雲體是也余見唐誥書名未見一楷字今人押字
或多押名猶是此意王荆公押石字初橫一畫左引脚
中為一圈公性急作圈多不圓往往窩扁而收橫畫又
多帶過常有密議公押反字者公知之加意作圈一日

書楊蟠差遣勅作圈復不圓乃以濃墨塗去旁別作一
圈蓋欲矯言者楊氏至今藏此勅

祖宗時監司郡守薦部吏初無定員有其人則薦之故
人皆慎重不肯輕舉改官每歲殆無幾自慶歷後始以
屬邑多寡制數於是各務充元額不復更考材實改官
人歲遂增至數倍事有欲革弊而反以為弊者固不得
不慎其初治平中賈直孺為中司嘗以為言朝廷終莫
能處蓋人情沿習既久雖使復舊亦不可為也

祖宗時見任官應進士舉謂之鑠廳雖中選止令遷官而不賜科第不中者則停見任其愛惜科名如此淳化三年滁州軍事推官鮑當等應舉合格始各賜進士及第自是遂皆賜第

考異太平興國五年見任官赴殿試者六人惟單鍊周繕賜及第餘皆諸州節度掌書此云遷官而不賜科第非皆如此也

天聖末詔即河南永安縣嘗言王山建宮以奉太祖太宗

真宗神宗御容欲其近陵寢也宮成賜名會聖改訾王
山為鳳臺山自是祖宗山陵成皆奉安於宮中蘇子瞻
神宗山陵曲赦文云啟鳳臺之仙宇架龜洛之仁祠鳳臺
以山名也宣祖初葬今京城南既遷陵寢遂以其地建
奉先寺仍為別殿歲時奉祠宣祖昭憲太后其後祖宗
山陵遂皆即京師寺宇為殿如奉先故事興國開先殿
以奉太祖啟聖院永隆殿以奉太宗慈孝崇真殿以奉
真宗普安殿以奉元德皇后元豐間建景靈宮於是皆

奉迎以置原廟自奉先而下皆廢普安亦元德皇后殯
宮舊地也

咸平中以侍讀侍講班秩未崇乃命楊徽之為翰林侍
讀學士邢昺為侍講學士班翰林學士下講讀置學士
自此始其後昺以老請補外真宗以其久在講席使以
本職知曹州而張文節公罷參知政事知天雄軍改翰
林侍讀學士於是講讀學士始為兼職得外任慶曆後
凡自翰林學士出者例皆換侍讀學士遂為故事

考異咸平二年命楊徽之夏侯嶠呂文仲為翰林侍
讀學士此止載楊徽之未盡也云講讀學士始為兼
職非兼也

趙中令為相李處耘為樞密使處耘之女為中令子婦
並居二府不避姻家皇祐中文潞公為相程康肅為樞
密副使熙寧中王荊公為相吳正憲為樞密副使皆不
避

江南李煜既降太祖嘗因曲燕問聞鄉在國中好作詩

因使舉其得意者一聯煜沉吟久之誦其詠扇云揖讓
月在手動搖風滿懷上曰滿懷之風却有多少他日復
燕煜顧近臣曰好一箇翰林學士

咸平三年王魏公知舉數日即院中拜同知樞密院事
當時以為科舉盛事余紹聖試禮部時鄧安惠公溫伯
以翰林學士承旨知舉亦就拜尚書右丞時試已第二
場鄧公自廳事上馬揚鞭左右揖諸生而去自魏公後
繼之者惟鄧公也

吳越錢俶初來朝將歸朝臣上疏請留勿遣者數十人
太祖皆不納曰無慮俶若不欲歸我必不肯來放去適
可結其心及俶辭力陳願奉藩之意太祖曰盡我一世
盡你一世乃出御封一匣付之曰到國開視道中勿發
也俶載之而歸日焚香拜之既至錢塘發視乃羣臣請
留章疏俶覽之泣下曰官家獨許我歸我何可負恩及
太宗即位以盡一世之言遂謀納土

寇萊公性豪侈所臨鎮燕會常至三十醜必盛張樂尤

喜柘枝舞用二十四人每舞連數齣方畢或謂之柘枝
顛始罷樞密副使知青州太宗眷之未衰數問左右寇
準在青州樂否如是一再有揣帝意欲復用者即曰陛
下思準不少忘聞準日置酒縱飲未知亦思陛下否上
雖少解然明年卒召為參知政事祖宗用人之果不使
細故讒人得乘間如此

林文節連為開封府南省第一廷試皆屬以魁選仁宗
亦遣近璫伺其程文畢先進呈時試民監賦破題云天

監不遠民心可知比至上前一近侍傍觀忽吐舌蓋惡其語忌也仁宗由是不樂亟付考官依格考校考官之意不敢置之上等入第三甲而得章子平卷子破題云運啟元聖天臨兆民上幸詳定幕次即以進呈上曰此祖宗之事朕何足以當之遂擢為第一



